



苑詩類選卷之十三

明監察御史包節輯按察司知事前給事中王交校

樂府部三

行路難

費昶

君不見人生百年如流電心中坎壈君不見我昔初入
椒房時詎減班姬與飛燕朝踰金梯上鳳樓暮下瓊鉤
息鸞殿栢梁晝夜香錦帳自飄颻笙歌席上吹琵琶陌
上桑過蒙恩所賜餘光曲沾被既逢陰后不自專復值
程姬有所避黃河千年始一清微軀再逢永無議蛾眉
偃月徒自妍傅粉施朱欲誰為不如天淵水中鳥雙去

雙飛長比翅

又

吳均

君不見上林苑中客冰羅霧縠象牙席盡是得意忘言
者探腸見膽無所惜白酒甜鹽甘如乳綠觴皎鏡華如
碧少年持名不肯嘗安知白駒應過隙博山鑪中百和
香爵金蘇合及都梁逶迤好氣佳容貌經過青瑣歷紫
房已入中山馮后帳復上皇帝班姬牀班姬失寵顏不
開奉筵供養長信臺日暮耿耿不能寐秋風切切四面
來玉階行路生細草金鑪香炭變成灰得意失意須臾
頃非君方寸逆所裁

又

盧照鄰

君不見長安城北渭橋邊枯木橫槎卧古田昔日含紅
復含紫當時畱霧亦畱煙春景春風花似雪香車玉輦
恒闐咽若箇遊人不競攀若個倡家不來折倡家寶袜
蛟龍帔公子銀鞍千萬騎黃鶯一向花嬌春兩兩三三
將子戲千尺長條百尺枝丹桂青榆相蔽虧珊瑚葉上
鴛鴦鳥鳳凰巢裏鷓鴣兒巢傾折鳳歸去條枯葉落狂
風吹一朝零落無人問萬古摧殘君詎知人生貴賤無
終始倏忽須臾難久恃誰家能駐西山日誰家能偃東
流水漢家陵樹滿秦川行來行去盡哀憐自昔公卿二

千石咸擬榮華一萬年不見朱唇將白貌惟聞素棘與
黃泉金貂有時須換酒玉塵但搖莫計錢寄言坐客神
仙署一生一死交情處蒼龍闕下君不來白鶴山前我
應去雲間海上邈難期赤心會合在何時但願堯年一
百萬長與巢由也不辭

又

張紘

君不見溫家玉鏡臺提携抱握九重來君不見相如綠
綺琴一撫一拍鳳凰音人生意氣須及早莫負當年行
樂心荆王奏曲楚妃嘆曲盡歡終夜將半朱樓銀閣正
平生碧草青苔坐蕪蔓當春對酒不須疑視日相看能

幾時春風吹盡燕初至此時自為稱君意秋霜萎草鴻
始歸此時衰暮與君違人生翻覆何常定誰保容顏無
是非

又

李白

金尊清酒斗十千玉盤珍羞直萬錢停杯投箸不能食
拔劍四顧心茫然將渡黃河冰塞川將登太行雪暗天
閑來垂釣坐溪上忽復乘舟夢日邊行路難行路難多
岐路今安在長風破浪會有時直挂雲帆濟滄海

又

李頎

漢家名臣楊德祖四代五公享茅土父兄子弟縮銀黃

躍馬鳴珂朝建章
火浣單衣繡方領
茱萸錦帶玉盤囊
賓客填街復滿座
片言出口生輝光
世人逐勢爭奔走
瀝膽隳肝唯恐後
當時一顧生青雲
自謂生死長隨君
一朝謝病還鄉里
窮巷蒼茫絕知己
秋風落葉閉重門
昨日論交竟誰是
薄俗嗟嗟難重陳
深山麋鹿下為鄰
魯連所以蹈滄海
古往今來稱達人

又

崔顥

君不見建章宮中金明枝
萬萬長條拂地垂
二月三月花如霰
九重幽深君不見
艷彩朝含四寶宮
香風吹入朝雲殿
漢家宮女終未闌
愛此芳香朝暮看
看看去者來

心不忘攀折
將安鏡臺上
雙雙素手翦不成
兩兩紅妝笑相向
建章昨夜起春風
一花飛落長信殿
長信殿人見花泣
憶此珍樹何嗟及
我昔初在昭陽時
朝折暮折登玉墀
祇言歲歲長相對
不寤今朝遙相思

又

高適

長安少年不少錢
能騎駿馬鳴金鞭
五侯相逢大道邊
美人弦管爭畱連
黃金如斗不敢惜
片言如山莫棄捐
安知顥頽讀書者
暮宿虛臺私自憐

蜀道難

劉孝威

嶠山金碧有光輝
遷停車馬正輕肥
彌思王褒擁節去

復想相如乘傳歸君平子雲寂不嗣江漢英靈已信稀

又

陰鏗

王尊奉漢朝靈關不憚遙高岷長有雪陰棧屢經燒輪
摧九折路騎阻七星橋蜀道難如此功名詎可要

又

李白

噫吁噫危乎高哉蜀道之難難於上青天
巖巖及魚鳧開國何茫然爾來四萬八百歲
乃與秦塞通人煙西當太白有鳥道可以橫
絕峨眉巔地崩山摧壯士死然後天梯石棧
相鉤連上有六龍迴日之高標下有衝波逆
折之迴川黃鶴之飛尚不得援猿欲度愁攀緣
青泥何

盤盤百步九折縈巖巖捫參歷井仰脅息以手撫膺坐
長嘆問君西遊何時還畏途巉巖不可攀但見悲鳥號
枯木雄飛呼雌遠林間又聞子規啼夜月愁空山蜀道
之難難於上青天使人聽此彫朱顏連峰去天不盈尺
枯松倒挂倚絕壁飛湍瀑流爭喧飈砮崖轉雪萬壑雷
其嶮也若此嗟爾遠道之人胡為乎來哉劍閣崢嶸而
崔嵬一夫當關萬夫莫開所守或匪親化為狼與豺朝
避猛虎夕避長蛇磨牙吮血殺人如麻錦城雖云樂不
如早還家蜀道之難難於上青天側身西望長咨嗟

公子行

劉希夷

天津橋下陽春水天津橋上繁華子馬聲迴合青雲外
人影搖揚綠波裏綠波清迥玉為砂青雲離披錦作霞
可憐楊柳傷心樹可憐桃李斷腸花此日遨遊邀美女
此時歌舞入倡家倡家美女鬱金香飛去飛來公子旁
的的珠簾白日映娥娥玉顏紅粉粧花際徘徊雙蛺蝶
池邊顧步兩鴛鴦傾國傾城漢武帝為雲為雨楚襄王
古來容光人所羨况復今日遙相見願作輕羅著細腰
願為明鏡分嬌面與君相見轉相親與君雙棲共一身
願作貞松千歲古誰論芳槿一朝新百年同謝西山日
千秋萬古比邱塵

結客少年場行

劉孝威

少年本六郡遨遊遍五都插腰銅匕首障日錦塗蘇鷲
羽裝銀鍔犀膠飾象孤近發連雙兔高彎落九烏邊城
多警急節使滿郊衢居延箭箠盡踈勒并泉枯正蒙都
護接何由憚險途千金募惡少一麾擒骨都勇餘聊蹴
鞠戰罷戲投壺昔為北方將今為南面孤邦君行負弩
縣令且前驅

又

孔紹安

結客佩吳鉤橫行度隴頭鴈在弓前落雲從陣後浮吳
師驚燧象燕將警奔牛轉蓬飛不息冰河結未流若使

三邊定當封萬里侯

又

虞世南

韓魏多奇節，個儻遺名利。共矜然諾心，各負縱橫志。結友一言重，相思千里至。綠沉明月弦，金絡浮雲轡。吹簫入吳市，擊筑遊燕肆。尋源博望侯，結客遠相求。少年重一顧，長驅背隴頭。啖啖霜戈動，耿耿劍虹浮。天山冬夏雪，交河南北流。雲起龍沙暗，木落鴈行秋。輕生狗知已，非是為身謀。

又

虞羽客

幽并俠少年，金絡控連錢。竊符方救魏，擊筑正懷燕。輕

生辭鳳闕，揮袂上祁連。陸離橫寶劍，出沒驚徂旃。蒙輪恒顧敵，超乘忽爭先。摧枯逾百戰，拓地遠三千。骨都魂已散，樓蘭首復傳。龍城含曉霧，瀚海隔遙天。歌吹金微返，振旅玉門旋。烽火今已息，非復照甘泉。

又

盧照鄰

長安重遊俠，洛陽富才雄。玉劍浮雲騎，金鞍明月弓。關雞過渭北，走馬向關東。孫賓遙見待，郭解暗相通。不受千金爵，誰論萬里功。將軍下天上，虜騎入雲中。烽火夜似月，兵氣曉成虹。橫行狗知已，負羽遠征戎。龍旌昏朔霧，烏陣卷寒風。追奔瀚海咽，戰罷陰山空。歸來謝天子

何如馬上翁

又

李白

紫燕黃金瞳啾啾搖綠鬃平明相馳逐結客洛門東少年學劍術陵轢白猿公珠袍曳錦帶匕首插吳鴻由來萬夫勇挾此生雄風託交從劇孟買醉入新豐笑盡一杯酒殺人都市中羞道易水寒從今日貫虹燕丹事不立虛沒秦帝宮舞陽死灰人安可與成功

少年行二首

前人

擊筑飲美酒劍歌易水湄經過燕太子結託并州兒少年負壯氣奮翼自有時因聲魯句踐爭博勿相欺

其二

五陵少年金市東銀鞍白馬度春風落花踏盡遊何處笑入胡姬酒肆中

又三首

李嶷

十八羽林郎戎衣事漢王臂鷹金殿側挾彈玉輿旁馳道春風起陪遊出建章

其二

侍獵長楊下承恩更射飛塵生馬影滅月落鴈行稀薄暮隨歸仗聯翩入瑣闈

其三

玉劍膝邊橫金杯馬上傾朝遊茂陵道暮宿鳳凰城豪
吏多猜忌無勞問姓名

又三首

王維

新豐美酒斗十千咸陽遊俠多少年相逢意氣為君飲
繫馬高樓垂柳邊

其二

漢家君臣歡宴終高義雲臺論戰功天子臨軒賜侯印
將軍佩出明光宮

其三

出身事漢羽林郎初隨驃騎戰魚陽孰知不向邊庭苦

縱死猶聞俠骨香

又

王昌齡

走馬還相尋西樓下夕陰結交期一劍留意贈千金高
閣歌聲遠重關柳色深夜閑須盡醉莫負百年心

又

劉長卿

射飛誇侍獵行樂愛聯鑣薦枕青蛾艷鳴鞭白馬驕曲
房珠翠合深巷管絃調日晚春風裏衣香滿路飄

長安少年行

何遜

長安美少年羽騎暮連翩玉羈瑪瑙勒金絡珊瑚鞭陣
雲橫塞起赤日下城圓虎落夜方寢魚麗曉復前

渭城少年行

崔顥

洛陽二月梨花飛秦地行人春憶歸揚鞭走馬城南陌
朝逢驛使秦川客驛使前日發章臺傳道長安春早來
崇棣宮中燕初至蒲萄館裏花正開念此使人歸更早
三月便達長安道長安道上春可憐搖風蕩日曲河邊
萬戶樓臺臨渭水五陵花柳滿秦川秦川寒食盛繁華
遊子春來喜見花鬪雞下杜塵初合走馬章臺日半斜
章臺帝城稱貴里青樓日晚歌鍾起貴里豪家白馬驕
五陵年少不相饒雙雙扶彈來金市兩兩鳴鞭上渭橋
渭城橋頭酒初熟金鞭白馬誰家宿可憐錦瑟琴琵琶

玉壺清酒就君家小婦春來不解羞嬌歌一曲楊柳花

邯鄲少年行

高適

邯鄲城南遊俠子自矜生長邯鄲裏千場縱博家仍富
幾度報讎身不死宅中歌笑日紛紛門外車馬如雲屯
未知肝膽向誰是令人却憶平原君君君不見今人交態
薄黃金用盡還疏索以茲感激辭舊遊更於時事無所
求且與少年飲美酒往來射獵西山頭

門有車馬客行

張正見

飛觀霞光啓重門平旦開北闕高箱過東方連騎來紅
塵揚翠轂赭汗染龍媒桃花夾逕聚流水傍池回投鞭

聊靜電接軫暫停雷非關萬里客自有六竒才琴和朝
雉操酒泛夜光杯舞袖飄金谷歌聲繞鳳臺良時不可
再騶馭爵相催安知太行道失路車輪摧

又

虞世南

財雄重交結戚里擅豪華曲臺臨上路高門抵狹斜
汗千金馬繡轂五香車白鶴隨飛蓋朱鷺入鳴笳夏蓮
開劍水春桃發露花輕裙染回雪浮蟻泛流霞高談辨
飛兔摘藻握靈蛇逢恩借羽翼失路委沙泥曖曖風煙
晚路長歸騎遠日衰青瑣第塵飛金谷苑危弦促柱奏
巴歛遺簪墮珥解羅襦如何守直道翻使谷名愚

又

李白

門有車馬客金鞍曜朱輪謂從丹霄落乃是故鄉親呼
兒掃中堂坐客論悲辛對酒兩不飲停觴淚盈巾歎我
萬里遊飄飄三十春寧談霸王畧紫綬不挂身雄劍藏
玉匣陰符生素塵麻落無所合流離湘水濱借問宗黨
間多為泉下人生苦百戰後死託萬鬼隣北風揚胡沙
埋騎周與秦大運且如此蒼穹寧匪仁惻愴竟何道存
亡任太鈞

劉生

梁元帝

任俠有劉生然諾重西京扶風好驚坐長安恒借名摺

花聊夜飲竹葉解朝醒結交李都尉遨遊往麗城

又

陳後主

遊俠長安中置驛過新豐擊鍾蒲壁磬鳴弦楊葉弓孟
公正驚客朱家始買童羞作荆卿笑捧劍出遼東

又

張正見

劉生絕名價豪俠恣遊陪金門四姓聚繡轂五香來塵
飛瑪瑙勒酒映琤璆杯別有追遊夜秋窻向月開

又

江暉

五陵多美選六郡盡良家劉生代豪蕩標舉獨榮華寶
劍長三尺金尊滿百花唯當重意氣何處有驕奢

又

柳莊

座驚稱字孟豪雄道姓劉廣陌通朱邱大路起青樓要
賢驛已置畱賓轄且投光斜日下霧庭陰月上鈎

又

江摠

劉生負意氣長笑且徘徊高論鳴秋水命賞陟春臺干
戈個儻用筆硯縱橫才置驛無年限遊俠四方來

又

楊炯

卿家本六郡年長三入秦白壁酬知己黃金謝主人劍
鋒生赤電馬足起紅塵日暮歌鍾發喧喧動四鄰

又

盧照鄰

劉生氣不平抱劍欲專征報恩為豪俠死難在橫行翠
羽裝劍鞘黃金飾馬纓但令一顧重不忝百身輕

俠客行

王筠

俠客趨名利劍氣坐相矜黃金塗鞘尾白玉飾鈎膺晨
馳逸廣陌日暮返平陵舉鞭向趙李與君方代興

又

庾信

俠客重連鑣金鞍被挂條細塵障路起驚花亂眼飄酒
醺人半醉汗濕馬全驕歸鞭畏日晚爭路上河橋

遊俠篇

王褒

京洛出名謳豪俠競交遊河南朝四姓關西謁五侯闔

雞橫大道走馬出長楸桑陰徙長夕槐路轉淹畱

又

陳良

洛陽麗春色遊俠騁輕肥水逐車輪轉塵隨馬足飛雲
影遙臨蓋花氣近薰衣東郊闔雞罷南皮射雉歸日暮
河橋上揚鞭惜晚暉

又

李白

趙客縵胡纓吳鉤霜雪明銀鞍照白馬颯踏如流星十
步殺一人千里不畱行事了拂衣去深箴身與名閑過
信陵飲脫劍膝前橫將炙啖朱亥持觴勸侯嬴三杯吐
然諾五嶽倒為輕眼花耳熱後意氣素霓生救趙揮金

鍾邯鄲先震驚千秋二壯士烜赫大梁城縱死俠骨香
不慙世上英誰能書閣下白首太玄經

又

崔顥

少年負膽氣好勇復知機仗劍出門去孤城逢合圍殺
人遼水上走馬漁陽歸錯落金鎖甲蒙茸貂鼠衣還家
行且獵弓矢速如飛地迥鷹犬疾草深狐兔肥腰間帶
兩綬轉眄生光輝顧謂今日戰何如隨建威

俠客控絕影

楊綰

青門小苑物華新花開鳥弄會芳春仙掌層臺浮艷日
長楸廣路起紅塵園中追尋桃李徑陌上逢迎遊俠人

遊俠英名馳上國人馬意氣俱相得白玉廉盧秋水劍
青絲宛轉黃金勒復有魚目并龍文躡景追風本絕羣
影入吳門疑曳練形來西北似浮雲寄語幽并馳射客
未肯推名持借君

輕薄篇

何遜

城東美少年重身輕萬億柘彈隋珠九白馬黃金飾長
安九達上青槐蔭道植較擊晨已喧肩排暝不息走狗
東西望牽牛向南直相期百戲旁去來三市側象牀香
繡被玉盤傳綺食大姊掩扇歌小妹開簾織相看獨隱
笑見人還斂色黃鶴悲故羣山枝詠新識鳥飛過客盡

萑聚行龍匿酌羽方戢戢此時歡未極

又

張正見

洛陽美年少朝日正開霞細蹀連錢馬旁趨首宿花揚
鞭還却望春色滿東家井桃映水落門柳雜風斜綿蠻
弄青綺蛺蝶繞承華欲往飛廉館遙駐季倫車石榴傳
馬瑤蘭看莫象牙聊持自娛樂未是聞豪奢莫嫌龍馭
晚扶桑復浴鷄

名士悅傾城

劉緩

不信巫山女不信洛川神何關別有物還是傾城人經
共陳王戲曾與宋家鄰未嫁先名玉來時本姓秦粉光

猶假面朱色不勝唇遙望疑花發聞香知異春夜夜言
嬌盡日日態還新已傾荀奉倩能迷石季倫上客徒畱
目不見正橫陳

中婦織流黃

梁簡文帝

翻花滿堦砌愁人獨上機浮雲西北起孔雀東南飛調
絲時繞腕易禡乍牽衣鳴梭逐動釧紅粧映落暉

又

徐陵

落花還井上春機當戶前帶衫行障口覓釧枕檀邊數
禡經無亂新漿緯易牽蜘蛛夜伴織百舌曉驚眠封用
黎陽土書因計吏船欲知夫壻處今督水衡錢

又

別人心已怨愁空日復斜
然香望韓壽磨鏡待秦嘉
殘絲愁續爛餘織恐嫌賒
支機一片石緩轉獨輪車
下簾還憶月挑燈更惜花
似天河上景春時織女家

又

虞世南

寒閨織素錦含怨斂雙蛾
綜新交縷澀經脆斷絲多
衣香逐舉袖釧動應鳴梭
還恐裁縫罷無信達交河

盧女曲

崔顥

二月春來半宮中日漸長
柳垂金屋暖花覆玉樓香
拂匣先臨鏡調笙更炙簧
還將盧女曲夜夜奉君王

盧姬篇

前人

盧姬少小魏王家綠鬢紅唇桃李花
魏王綺樓十二重水精簾箔繡芙蓉
白玉闌干金作柱樓上朝朝學歌舞
前堂後堂羅袖人南窻北窻花發春
翠幌珠簾闥弦管一奏一彈雲欲斷
君王日晚下朝歸鳴環佩玉生光輝
人生今日得嬌貴誰道盧姬身細微

美女篇

梁簡文帝

佳麗盡關情風流最有名
約黃能効月裁金巧作星
粉光勝玉靚衫薄擬蟬輕
密態隨流臉嬌歌逐軟聲
朱顏半已醉微笑隱香屏

又

盧思道

京洛多妖艷餘香愛物華
恒臨鄧渠水共採鄴園花
時搖五明扇聊駐七香車
情踈看笑淺嬌深盼欲斜
微津染長黛新溜濕輕紗
莫言人未解隨君獨問家

茱萸女

梁簡文帝

茱萸生狹斜結子復銜花
遇逢纖手摘濫得映鈿華
雜與鬟簪插偶逐鬢鈿斜
東西爭贈玉縱橫來問家
不無夫壻馬空駐使君車

又

萬楚

山陰柳家女九日採茱萸
復得東隣伴雙為陌上姝
插

花向高髻結子置長裾
作性恒遲緩非關蛇丈夫
平明折林樹日入及城隅
俠客邀羅袖行人挑短書
蛾眉自有主年少莫踟躕

春女行

王翰

紫臺穹跨連綠波紅軒鈴
匝垂纖羅中有一人金作面
隔幌玲瓏遙可見忽聞黃鳥鳴
且悲鏡邊含笑著春衣
羅袖嬋娟似無力行拾落花
比容色落花一度無再春
人生作樂須及辰君不見楚王臺上紅顏子今日皆成
狐兔塵

洛陽女兒行

王維

洛陽女兒對門居纔可顏容十五餘良人玉勒乘驄馬
侍女金盤膾鯉魚畫閣朱樓盡相望紅桃綠柳垂簷向
羅幃送上七香車寶扇迎歸九華帳狂夫富貴在青春
意氣驕奢劇季倫自憐碧玉親教舞不惜珊瑚持與人
春窻曙滅九微火九微片片飛花璫戲罷曾無理曲時
粧成祇是薰香坐城中相識盡繁華日夜經過趙李家
誰憐越女顏如玉貧賤江頭自浣沙

昭君怨

沈約

朝發披香殿夕濟汾陰河於茲懷九逝自此歛雙蛾沾
妝疑湛露繞臆壯流波日見奔沙起稍覺轉蓬多胡風
犯肌骨非直傷綺羅銜涕強南望關山鬱差我試作陽
春曲終成苦寒歌唯有三五夜明月暫經過

又

陳後主

圖形漢宮裏遙聘單于庭狼山聚雲暗龍沙飛雪輕笳
吟度隴咽笛轉出關嗚啼妝寒葉下愁眉塞月生

又

王褒

蘭殿辭新寵椒房餘故情鴻飛漸南陸馬首倦西征寄
書參漢使銜涕望秦城唯餘馬上曲猶作出關聲

又

薛道衡

我本良家子充選入椒庭不蒙女史進更無畫師情蛾

眉非本質蟬鬢改真形專由妾命薄誤使君恩輕啼落
渭橋路歎別長安城今夜寒草宿明朝轉蓬征却望關
山迥前瞻沙漠平胡風帶秋月嘶馬雜笳聲毛裘易羅
綺氊帳代帷屏自知蓮臉歇羞看菱鏡明釵落終應棄
髻解不須縈何用單于重詎假閑氏名馱馱聊彊食潼
酒未能傾心隨故鄉斷愁逐塞雲生漢宮如有憶而視
旄頭星

又

董思恭

琵琶馬上彈行路曲中難漢月正南遠燕山直北寒髻
鬟風拂亂眉黛雪沾殘斟酌紅顏盡徒勞握鏡看

又

張文琮

戒途飛萬里回首望三秦忽見天山雪還疑上苑春玉
痕垂淚粉羅袂拂胡塵為得胡中曲還悲遠嫁人

又

上官儀

玉關春色晚金河路幾千琴悲桂條上笛怨柳花前霧
掩臨粧月風驚入鬢蟬緘書待還使淚盡白雲天

又

盧照鄰

合殿恩中絕交河使漸稀肝腸辭玉輦形影向金微漢
宮草應綠胡庭沙正飛願逐三秋鴈年年一度歸

又

駱賓王

歛容辭豹尾絨怨度龍鱗金鈿明漢月玉筋染胡塵粧
鏡菱花暗愁眉柳葉頻唯有清笳曲時聞芳樹春

又

沈佺期

非君惜鸞殿非妾妬蛾眉薄命由驕虜無情是畫師嫁
來胡地惡不並漢宮時心苦無聊賴何堪上馬辭

又

梁獻

圖畫失天真容華坐誤人君恩不可再妾命在和親淚
點關山月衣銷邊塞塵一聞陽鳥至思絕漢宮春

又

顧朝陽

莫將鉛粉匣不用鏡花光一去邊城路何情更畫粧影

銷胡地月衣盡漢宮香妾死非關命祗緣怨斷腸

又二首

東方虬

漢道今全盛朝廷足武臣何須薄命妾辛苦遠和親

其二

拚涕辭丹鳳銜悲向白龍單于浪驚喜無復舊時容

又三首

郭元振

自嫁單于國長銜漢掖悲容顏日憔悴有甚畫圖時

其二

獸踐冰霜域嗟為邊塞人思從漢南獵一見漢家塵

其三

聞有南河信傳言殺畫師始知君念重更遣畫蛾眉

又

李白

漢家秦地月流影照明妃一上玉關道天涯去不歸漢
月還從東海出明妃西嫁無來日燕支長寒雪作花蛾
眉憔悴沒胡沙生乏黃金枉圖畫死留青塚使人嗟

又

劉長卿

自矜妖豔色不顧丹青人誰知粉績能相負却使容華
翻誤身上馬辭君嫁驕虜玉顏對人啼不語北風鴈急
浮雲秋萬里獨見黃河流纖腰不復漢宮寵雙蛾長向
胡天愁琵琶絃中苦調多蕭蕭羌笛聲相和可憐一曲

傳樂府能使千秋傷綺羅

又

陳昭

跨鞍今永訣垂淚別親賓漢地行將遠胡關逐望親交
河擁塞路隴首暗沙塵唯有孤明月猶能遠送人

婕妤怨

梁元帝

婕妤初選入含媚向羅幃何言飛燕寵青苔生玉墀誰
知同輦愛遂作裂紕詩以茲自傷苦終無長信悲

又

劉孝綽

應門寂已閉非復後庭時况在青春日萋萋綠草滋妾
身似秋扇君恩絕履綦詎憶遊輕輦從今賤妾辭

又

寂寂長信晚雀聲喧洞房蜘蛛網高閣駁蘇披長廊虛
殿簾幃靜閒塔花蕊香悠悠視日暮還復拂空牀

何思澄

又

日落應門閉愁思百端生况復昭陽近風傳歌吹聲

王叔英妻沈氏

又

陰鏗

栢梁新寵盛長信昔恩傾誰謂詩書巧翻為歌舞輕花
月分窻進苔草共階生妾淚衫前滿單眠夢裏驚可惜
逢秋扇何用合歡名

又

崔湜

不分君恩斷新粧視鏡中容華尚春日嬌愛已秋風枕
席臨窻曉幃屏向月空年年後庭樹榮落在深宮

又

嚴識玄

賤妾如桃李君王若歲時秋風一已勁搖落不勝悲寂
寂蒼苔滿沉沉綠草滋繁華非此日指輦競何辭

又

皇甫冉

由来詠團扇今已值秋風事逐時皆往恩無日再中早
鴻聞上苑寒露下深宮顏色年年謝相如賦豈工

代秋胡婦閨怨

邵陵王綸

蕩子從遊宦思妾守房櫳塵鏡朝朝掩寒衾夜夜空若

非新有悅何事久西東知人相憶否淚盡夢啼中

閨怨

江揔

寂寂青樓大道邊紛紛白雪綺窻前池上鴛鴦不獨自
帳中蘇合還空然屏風有意障明月燈火無情照獨眠
遼西水凍春應少薊北鴈來路幾千望君關山及早度
念妾桃李片時妍

姬人怨

前人

天寒海水慣相知空牀明月不相宜庭中芳桂憔悴葉
井上踈桐零落枝寒燈作花羞夜短霜鴈多情恒結伴
非為隴水望秦川直置思君腸自斷薄命夫婿好神仙

逆愁高飛向紫煙金丹欲成猶百鍊玉酒新熟幾千年
妾家邯鄲好輕薄特念仙童一丸藥自悲行處綠苔生
何悟啼多紅粉落莫輕少婦狎春風羅襪也得步河宮
雲車欲駕應相待羽衣未去幸須同不學蕭史還樓上
會逐姮娥戲月中

妾薄命

梁簡文帝

名都多麗質本自恃容姿蕩子行未至秋胡無定期玉
貌歇紅臉長頻串翠眉奩鏡迷朝色縫絨脆故絲本異
搖舟舂何關竊席疑生離誰拊背溘死詎來遲王嬙貌
本絕踉蹌入氈帷盧姬嫁日晚非復少年時轉山猶可

遂烏白望難期妾心徒自苦傍人會見嗤

又

劉孝威

去年從越障今歲歿胡庭嚴霜封碣石驚沙暗井陘玉
簪久落鬢羅衣長挂屏浴蠶思漆水挑桑憶鄭垌寄書
朝鮮吏畱劍武安亭勿言戎夏隔但念心契冥不見豐
城劍千祀復同形

又

杜審言

草綠長門掩苔青永巷幽寵移新愛奪淚落故情畱啼
鳥驚殘夢飛花攪獨愁自憐春色罷團扇復迎秋

又

劉元淑

自從別後守空閨遙聞征戰起雲梯夜夜愁君遼海外
年年棄妾渭橋西陽春白日照空暖紫燕銜花向庭滿
絲鷺琴裏怨聲多飛鵲鏡前粧梳斷誰家夫壻不從征
應是漁陽別有情莫道紅顏燕地少家家還是洛陽城
且逐新人殊未歸還令秋至夜霜飛北斗星前橫度鴈
南樓月下搗寒衣夜深聞鴈腸欲絕獨坐縫衣燈又滅
暗啼羅帳空自憐夢度陽關向誰說每憐容貌宛如神
如何薄命不勝人願君朝夕燕山至好作明年楊柳春

擣衣三首

柳惲

孤衾引思緒獨枕悵憂端深庭秋草綠高門白露寒思

君起清夜促柱奏幽蘭不怨飛蓬苦徒傷蕙草殘

其二

行役滯風波遊人淹不歸亭臯木葉下隴首秋雲飛寒
園夕鳥集思牖草蟲悲嗟矣當春服安見禦冬衣

其三

步攔杏不極離堂肅已扃軒高夕杵散氣爽夜磻鳴瑤
箏隨步響幽蘭逐袂生踟躕理金翠容與納宵清

銅雀妓

何遜

秋風木葉落簫瑟管絃清望陵歌對酒向帳舞空城寂
寂簷宇曠飄飄帷幔輕曲終相顧起日暮松柏聲

又二首

王勃

妾本深宮妓曾城閉九重君王歡愛盡歌舞為誰容錦
衾不復襲羅衣誰再縫高臺西北望流涕向青松

其二

金鳳鄰銅雀漳河望鄴城君王無處所臺榭若平生舞
筵紛可就歌梁儼未傾西陵松檟冷誰見綺羅情

又

喬知之

金閣惜分香鉛華不重粧空餘歌舞地猶是為君王哀
弦聲已絕艷曲不須長共看西陵暮秋煙生白楊

又

沈佺期

昔年分鼎地今日望陵臺一旦雄圖盡千秋遺令開綺
羅君不見歌舞妾空來恩共漳河水東流無重迴

又

僧皎然

強開尊酒向陵看憶得君王舊日歡不覺餘歌悲自斷
非關艷曲轉聲難

銅雀臺

張正見

淒涼銅雀晚搖落墓田通雲慘當歌日松吟欲舞風入
踈瑤席冷曲罷總帷空可惜年將淚俱盡望陵中

又

荀仲舉

高臺秋色晚直望已悽然况復歸風便松聲入斷絃淚

逐梁塵下心隨團扇捐誰堪三五夜空對月光圓

又

王無競

北登銅雀上西望青松郭總帳空蒼蒼陵田紛漠漠平
生事已變歌吹宛猶昨長袖拂玉塵遺情結羅幙妾怨
在朝露君恩豈中薄高堂奏曲終曲終淚橫落

又

鄭愔

日斜漳浦望風起鄴臺寒玉座平生晚金尊妓吹闌舞
餘依悵泣歌罷向陵看蕭索松風暮秋煙入井欄

又

賈至

日暮銅雀靜西陵烏雀歸撫絃心斷絕聽管淚霏微靈

机臨朝奠空牀卷夜衣蒼蒼川上月應照妾魂飛

又

劉長卿

嬌愛更何日高臺空數層含啼映雙袖不忍看西陵漳
水東流無復來百花輦路為蒼苔青樓月夜長寂寞碧
雲日暮空徘徊君不見鄴中萬事非昔時古人何在今
人悲春風不逐君王去草色年年舊宮路宮中歌舞已
浮雲空指行人往來處

又

梁氏瓊

歌扇向陵開齊行奠玉杯舞時飛燕列夢裏片雲來月
色空餘恨松聲暮更哀誰憐未死妾掩袂下銅臺

長門怨

柳惲

玉壺夜悄悄應門重且深秋風動桂樹流月搖輕陰綺
簷清露溽網戶思蟲吟嘆息下蘭閣含愁奏雅琴何由
鳴曉佩復得抱宵衾無復金屋念豈照長門心

又

喬備

秋入長門殿木落洞房虛妾思宵徒靜君恩日更踈墜
露清金閣流螢點玉除還將閨裏恨遙問馬相如

又

沈佺期

月皎風泠泠長門吹掖庭玉階聞墜葉羅幌見飛螢清
露凝珠綴流塵下翠屏妾心君未察愁嘆劇繁星

又

齊澣

熒熒孤思逼寂寂長門夕妾妬亦非深君恩那不惜携
琴就玉階調悲聲未諧將心託明月流影入君懷

又二首

李白

天迴北斗挂西樓金屋無人螢火流月光欲到長門殿
別作深宮一段愁

其二

桂殿長愁不記春黃金四屋起秋塵夜懸明鏡青天上
獨照長門宮裏人

又

崔顥

君王寵初歇棄妾長門宮紫殿青苔滿高樓明月空夜
愁生枕席春意罷簾櫳泣盡無人問容華落鏡中

又

賈至

獨坐思千里春庭曉景長鶯喧翡翠幕柳覆鬱金香舞
蝶繁愁緒繁花對靚粧深情託瑤瑟絃斷不成章

又

岑參

君王嫌妾妬閉妾在長門舞袖垂新寵愁眉結舊恩綠
錢生履迹紅粉濕啼痕羞被桃花笑看春獨不言

又

劉長卿

何事長門閉珠簾只自垂月移深殿早春向後宮遲蕙

草生閒地梨花發舊枝芳菲自恩幸看却被風吹

又

劉言史

獨坐爐邊結夜愁暫時恩去亦難留手持金筋垂紅淚
亂撥寒灰不舉頭

又二首

鄭谷

閒把羅衣泣鳳凰先朝曾教舞霓裳春來却羨庭花落
得逐晴風出禁牆

其二

流水君恩共不回杏花爭忍掃成堆殘春未必多煙雨
淚滴閒階長綠苔

長信怨

王諶

飛燕倚身輕爭人巧笑名生君棄妾意增妾怨君情日
落昭陽壁秋來長信城寥寥金殿裏歌吹夜無聲

又

李白

月皎昭陽殿霜清長信宮天行垂玉輦飛燕與君同更
有畱情處承恩樂未窮誰憐團扇妾獨坐怨秋風

又二首

王昌齡

金井梧桐秋葉黃珠簾不捲夜來霜金爐玉枕無顏色
卧聽南宮清漏長

其二

奉帚平明金殿開，暫將團扇共徘徊。
玉顏不及寒鴉色，猶帶昭陽日影來。

白頭吟

張正見

平生懷直道，桂松比真風。
語默妍媸際，沉浮毀譽中。
讒新恩易盡，情去寵難終。
彈珠金市側，抵玉崑山東。
含香老顏駟，執戟異楊雄。
惆悵崔亭伯，幽憂馮敬通。
王媵沒故塞，班女棄深宮。
春苔封履跡，秋葉奪粧紅。
顏如花落槿，鬢似雪飄蓬。
此時積長嘆，傷年誰復同。

又

劉希夷

洛陽城東桃李花，飛來飛去落誰家。
洛陽女兒惜顏色

行逢落花長嘆息，今年花落顏色改，
明年花開復誰在。已見松柏摧為薪，
更聞桑田變成海。古人無復洛城東，
今人還對落花風。年年歲歲花相似，
歲歲年年人不同。寄言全盛紅顏子，
須憐半死白頭翁。此翁白頭真可憐，
伊昔紅顏美少年。公子王孫芳樹下，
清歌妙舞落花前。光祿池臺文錦繡，
將軍樓閣畫神仙。一朝卧病無人識，
三春行樂在誰邊。宛轉蛾眉能幾時，
須臾白髮亂如絲。但看舊來歌舞地，
唯有黃昏鳥雀悲。

怨詩

劉孝威

退寵辭金屋，見譴斥甘泉。
枕席秋風起，房櫳明月懸。
燭

避窻中影香迴鑪上煙丹庭斜草徑素壁點苔錢歌起
蒲生曲樂奏下山弦新聲昔廣宴餘杯今自傳王嬙向
絕漠宗女入邠連鴈書猶未返角馬無歸年昭臺省媵
御曾坂無棄捐後薪隨復積前魚誰復憐

又

張正見

新豐妖冶地遊俠競嬌奢池臺間羅綺桃李雜煙霞
影分連騎衣香合並車豔粉驚飛蝶紅粧映落花舞衫
飄冶袖歌扇掩團紗玉牀珠帳卷金樓鏡月斜還疑蕭
史鳳不及季倫家

又二首

薛竒童

日晚梧桐落微寒入禁垣月懸三雀觀霜度萬秋門
艷舞矜新寵愁容泣舊恩不堪深殿裏簾外欲黃昏

其二

禁苑春風起流鶯繞合歡玉窻通日氣珠箔卷輕寒楊
葉垂陰砌梨花入井欄君王好長袖新作舞衣寬

又

劉元濟

玉關芳信斷蘭閨錦字新愁來好自抑念切已忘頻虛
牖風驚夢空牀月馱人歸期儻可促勿度柳園春

怨歌行

梁簡文帝

十五頗有餘日照杏梁初蛾眉本多嫉掩鼻特成虛持

此傾城貌翻為不肖軀秋風吹海水寒霜依玉除月光
臨戶駛荷花依浪舒望簷悲雙翼窺沼泣玉餘苔生履
處沒草合行人踈裂紈傷不盡歸骨恨難祛早知長信
別不避後園輿

又

虞世南

紫殿秋風冷雕甍白日沉裁紈悽斷曲織素別離心掖
庭羞改畫長門不惜金寵移恩稍薄情踈恨轉深香銷
翠羽帳弦斷鳳凰琴鏡前紅粉歇塔上綠苔侵誰言掩
歌扇翻作白頭吟

苑詩類選卷之十三



